

12. maj 2015

Nunatsinni tamani utoqqaat illuisa pilersaarusiorfigineqarnissaanik siunnersuut apeqquteqaat aallaavigalugu oqallittoqarnissaanik siunnersuut tamatumuuna saqqummiuppara. (Inatsisartunut ilaasortaq Hans Enoksen, Partii Naleraq)

Aallarniutigalugu apeqquteqaat aallaavigalugu oqallittoqarnissaanik massuminnga siunnersuuteqartoq Hans Enoksen, Partii Naleraq Siumumiit qutsaviginiarparput qulequttamut pingaaruteqartumik qaqitsineranut.

Siumumiit aallarniutigalugu oqariartuutigerusutarput tassaavoq inuiaqatigiittut aaqqissugaanitsinni annertuumik ajornartorsiuteqaratta, taakkualu aatsaat ilaatigut assersuutigalugu isumaginnikkut ikiorsiissuteqartarnermi kiisalu ineqarnermi tunngasutigut iluarsartuussinikkut aaqqiivigineqarsinnaapput, soorlu qulequtaq uani pineqartoq aamma eqqarsaatigalugu. Taamaattumik politikikkut partiit assigiinngitsut suleqatigiittariaqarpugut kinguariit tulliisa atugartuussutsimik tunngaveqasappata, akiligassarlu meeqqatsinnut kinguaassatsinnullu ingerlatissanngikkutsigu.

Soorlu siunnersuuteqartup erseqqissaatigigaa nunatsinni utoqqaat amerliartorput sulilu amerliartortuarnissaat aamma misissuinikkut naatsorsorneqareersimalluni. Tamanna qujanarpoq, inuiaqatigiittummi peqqissutsikkut inuuniarnikkullu ajunnginnerusumik atugaqalersimanitta tamanna takusutissaraa, naak suli pitsanngorsaatissat unamminartut suliassarigaluarlutigik.

Siumumi tunngaviusumik isumarput tassaavoq utoqqaat nammineq angerlarsimaffimmini sapi-nngisamik siviunerpaamik najugaqarnissaat qulakkeerneqassasoq, tamatumanilu soorunami aamma inuuniarnikkut atugassarititaasut pitsaasuusariaqarnerat avaqqunneqarsinnaanani.

Siumumi arajutsisimannngilarput utoqqaat amerliartornerisa kingunerisaanik sinerissami ilaatigut utoqqaat illuinut nuunniartut siviisuumik utaqqisariaqartarnerat, tamannalu soorunami ilungersunarpoq piaartumillu aaqqiivigeqartariarluni.

Siunnersuuteqartup tunngavilersuuteqarnermini tikippaattaaq ilaatigut innuttaasut innarluuteqalersimasut suli utoqqalisimannngikkaluarlutik utoqqaat illuinut inissinneqartartut allamik inissaqartinneqannginnerat pissutaalluni. Tamassumalu piffinni amerliartuinnartuni atugaaleraluttuinnarnera Siumumiit aamma arajutsisimannngilarput, qanorlu iliuseqartoqartariaqarneranik ersersitsilluni.

Utoqqaat illuisa ullutsinnut naleqqussarneqarnissaat avaqqunneqarsinnaajunnaartoq Siumumiit isumaqarpugut, matumani aamma utoqqalinermi nappaataalersartut eqqarsaatigalugit utoqqaat illuisa ilusilersugaanerat pitsaanerusumik tamanut avatangiiseqartitsisoq nukittorsartariaqarmat.

Taamaattumik Siumumiit siunnersuuteqartup nunatsinni utoqqaat illuisa pilersaarusiorfigineqarnissaanik oqariartuutaa tamakkiisumik taperseratsigu matumani oqaatigissavarput, tamannalu kommuunit qanimut peqatigeqqinnaarnerisigut pissasoq Siumumiit aamma kaammattuutigis-sallutigu.

Utoqqaat inuiaqatigiinni qitiupput, utoqqaallu pillugit Siumumi politikkitsinni inuup naleqassusia aallaaviuvoq. Taamaattumik toqqissisimaneq pitsaassuserlu utoqqalinermi toqqammaviusariaqartut Siumumiit isumaqarpugut. Nunatsinni utoqqanngorluni inooqataaneq nuannersuusariaqarpoq. Qujanaq.

Anders Olsen
Siumut.